

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. उपराज्यपाल मनोज सिन्हा होरें औंदी श्री अमरनाथ जी दी यात्रा दे मद्देनजर सुरक्षा बंदोबस्तें दा जायजा लैता ते मेद जाहिर कीती जे इस बरे दी यात्रा होर बी सुरक्षित ते अरामदायक होग।
2. उपराज्यपाल मनोज सिन्हा होरें औंदी अमरनाथ जी दी यात्रा गी कचरामुक्त बनाने लेई आई.ई.सी अभियान ते आर.डी.डी सरबन्धी नमिएं काह्डें आहले जत्ते दी शुरूआत कीती।
3. जम्मू-कश्मीर च कारोबार गी बढावा देने लेई विक्रेता-खरीदार सरबन्धी होर कार्जक्रमें गी आयोजित करने पर मुख्मन्त्री होरें जोर पाया।
4. श्री अमरनाथ जी दी यात्रा लेई ऑफलाइन पंजीकरण दी प्रक्रिया कल्लै थमां जम्मू दे 3 केंद्रे च शुरू होग।
5. चनाब दरेआ च पानी दे बददे स्तर दे मद्देनजर सलाल डैम दे गेट खोली दित्ते गेन। प्रशासन नै आम लोकें गी सरबन्धी हिदायत जारी कीती।

<><><><><><>

LG-Baltal

औंदी श्री अमरनाथ जी दी जात्तरा गी सुरक्षित ते बवस्था आहले ढंगै सिर करोआने लेई उपराज्यपाल मनोज सिन्हा होरें बालटाल आहले आधार शिविर दा दौरा लाया। उनें सुरक्षा बंदोबस्तें दा जायजा लैता। इस मौके पर सुरक्षा ते सिविल प्रशासन दे वरिष्ठ अधिकारी उन्दे कन्नै मौजूद हे। दौरे दौरान उपराज्यपाल होरें जमीनी सतह

पर कीते गेदे इंतजामें दा जायजा लैता ते तैयारिएं दा आंकलन कीता। मगरा मीडिया आहलें कन्नै गल्ल करदे होई एल.जी होरें आखेआ जे उनेंगी पूरा भरोसा ऐ जे इस बरे दी यात्रा पिछले बरे थवां बी खरी होग। उनें आखेआ।

<><><><><><>

LG-IEC Campaign

उपराज्यपाल मनोज सिन्हा होरें इस बरे दी श्री अमरनाथ जी दी यात्रा गी होर बी साफ-सुथरा ते पर्यावरण स्थाबै बनाने लेई ग्रामीण विकास मैहकमे आसेआ जागरूकता अभियान ते बक्ख-बक्ख पहलकदमियें गी शुरू कीता ऐ। इंदा मकसद श्री अमरनाथ जी दी यात्रा गी कचरामुक्त ते साफ-सुथरा बनाना ऐ। एल.जी होरें सब्बनें अगो अपील कीती जे ओहू इस वातावरण दी हरा-भरा ते सनाखड़ा बनाने लेई रलियै कम्म करन ते श्री अमरनाथ जी दी यात्रा गी जीरो वेस्ट तीर्थ यात्रा बनाने लेई अपना-अपना योगदान देन।

<><><><><><>

CM-SKICC Meet

मुख्यमंत्री उमर अब्दुल्ला होरें श्रीनगर स्थित शेर-ए-कश्मीर अंतरराष्ट्री कन्वेंशन सेंटर च अंतरराष्ट्री विक्रेता खरीदार कार्यक्रम दा उद्घाटन कीता। एहदे च हिस्सा लैने मगरा मुख्यमंत्री होरें आखेआ जे इयै जनेहू कार्यक्रम कारोबार गी बढ़ावा देने ते मकामी उद्योग गी होर निखारने च महत्वै आहले हुंदे न। एस.के.आई.सी.सी च मीडिया कर्मिएं कन्नै गल्ल करदे होई मुख्यमंत्री होरें आखेआ जे एहदा असर औने आहले बरें च दिक्खने गी लब्बोग। उनें आखेआ जे इयै जनेहू छडे इक कार्यक्रम कन्नै मता किश नेई होग पर एहू खरी शुरूआत ऐ। उनें आखेआ जे इयै नेहू घट्टोघट्ट 6 कार्यक्रम करोआए जाने लोड़चदे मुख्यमंत्री होरें आखेआ जे मुकामी उत्पादकें, विक्रेताएं ते मुख्य भरै थवां खरीदारें बश्कार नियमित तौर पर गल्लबात होनी लोड़चदी तां जे जम्मू-कश्मीर दे उत्पादें जिआं दस्तकारी, फल ते होर दुए उत्पादें गी बढ़ावा थहोई सकै। इस मौके पर बोलदे होई उनें आखेआ।

<><><><><><>

Tawi-Aarti

पैहली जुलाई थमां तवी आरती शुरु होआ करदी ऐ। एह आरती हर रोज संझां 7 बजे तवी नदी दे चौथे पुलै कश सूर्य पुत्री तवी नदी दे खब्बे कंडे पर होआ करोग। एहदा मकसद सांस्कृतिक विरासत ते आध्यात्मिक एकता गी बढ़ावा देना ऐ। मुकामी लोकें ते सैलानिएं गी एहदे च हिस्सा लैने लेई साद्दा दित्ता गेआ ऐ। प्रशासन आसेआ सुरक्षा ते भीड़ दे प्रबंधन लेई लोड़चदे सब्भै हीले करी लैते गेदे न। मीडिया आहलें गी संबोधित करदे होई जम्मू नगर निगम दे कमिशनर देवांश यादव होरें आखेआ।

<><><><><><>

DC-Kishtwar Sehat Aap

किश्तवाड़ दे डिप्टी कमिशनर पंकज कुमार शर्मा होरें अज्ज बैठक लाइयै J.K-E सेहत ऐप दे कम्मै-काजै दी समीक्षा कीती। J.K-E सेहत ऐप इक एकीकृत डिजिटल मंच ऐ जेदा मकसद सेहत दिक्खभाल गी होर बेहतर बनाना ऐ। बैठक दौरान किश्तवाड़ दे चीफ मेडिकल अफसर डॉ. रजिंद्र कुमार होरें डी.सी होरें गी जिले च पंजीकरण आंकड़ें बारै जानकारी दित्ती। एहदे अलावा डी.सी होरें सब्बनें मुतल्लका अधिकारियें गी निर्देश दित्ते जे सरकारी मुलाजमें दा तुरंत पंजीकरण यकीनी बनान ते कन्नै गै सेहत मैहकमे गी आखेआ जे लोकें दा पंजीकरण करोआने लेई अमले गी तैनात करन।

<><><><><><>

Token-Amarnath

श्री अमरनाथ जी दी जात्तरा दे मद्देनज़र सब्भनें लोड़चदी तैयारिएं गी जोरें-शोरें मुक्कदा रूप दित्ता जा'रदा ऐ। जम्मू रेलवे स्टेशन दे नेडे स्थित सरस्वती धाम च अज्ज बडुल थमां श्रद्धालुएं गी बशेश काउंटर दे राहें टोकन बंडे जा'रदे न। जम्मू साउथ दे S.D.M मनु हन्सा होरें दस्सेआ ऐ जे छड़ा इस्सै केन्द्र परा गै श्रद्धालु टोकन हासल करी सकदे न। तोआई श्री अमरनाथ जी दी जात्तरा लेई ऑफलाईन पंजीकरण दा कम्म कल्लै थमां त्रै केन्द्रें - वैष्णवी धाम, पंचैत भवन ते महाजन सभा च शुरु होग। प्रशासन नै सब्भनें श्रद्धालुएं गी गुजारिश कीती ऐ जे ओह सब्भै

लोड़चदे दस्तावेज अपने कन्नै रक्खन ते सुरक्षित ते बवस्थित जात्तरा लेई पंजीकरण सरबन्धी नियमें दी पालमा जकीनी बनान। इस बारे जानकारी दिंदे होई एस.डी.एम जम्मू साउथ Manu Hansa होरें आखेआ।

<><><><><><>

Dry-Run Banihal

औंदी श्री अमरनाथ जी दी यात्रा दी तैयारिएं दा जायजा लैने लेई जम्मू दे डिविजनल कमिशनर रमेश कुमार ते आई.जी.पी जम्मू भीम सेन तूती होरें जम्मू-श्रीनगर राश्ट्रीय जरनैली शिड़क पर बनिहाल थाहर ड्राई रन करिए अजमैश कीती। डिविजनल कमिशनर होरें चंद्रकोट स्थित लंगर आहली थाहर दा दौरा बी लाया। उनें साफ-सफाई, खाने, मेडिकल सुविधा ते ट्रैफिक प्रबंधन दा जायजा लैता। मीडिया कर्मिएं कन्नै गल्ल करदे होई डिविजनल कमिशनर होरें आखेआ।

<><><><><><>

Jammu-Police Security

औंदी श्री अमरनाथ जी दी सलाना जात्तरा लेई अपनी तैयारिएं गी तगड़ा करदे होई जम्मू पुलसै, नीम फौजी बलें दे तालमेल कन्नै बक्ख-बक्ख महत्वपूर्ण थाहें पर सांझे नाके स्थापित करदे होई सुरक्षा सरबन्धी हीलें गी होर बधाई दिता ऐ। राश्ट्री जरनैली सिड़क सने शैह्ला दे बाह्ले इलाकें ते भगवती नगर आधार शिविर बक्खी जाने आहले सिड़कें सने होरनें संवेदनशील इलाकें च 24 घैंटे कम्म करने आहली जांच चौकियां स्थापित कीतीआं गेइयां न। इस पैहलकदमी दा मकसद श्री अमरनाथ जी दी जात्तरा गी सुरक्षित ते बवस्थित बनाना ऐ। जम्मू पुलस दे सीनियर ऐहलकार, निजी तौर उप्पर निगरानी करै करदे न ते बड़ी मती सतर्कता ते सार्वजनिक सुरक्षा जकीनी बनाने बक्खी ध्यान केन्द्रित कीता जा'रदा ऐ।

<><><><><><>

Ramban-Yatra Arrangements

3 जुलाई थमां शुरू होआ'रदी सालाना श्री अमरनाथ जी दी जात्तरा लेई तैयारियें गी मुकदा रूप दित्ता जा'रदा ऐ। सख्त सुरक्षा बंदोबस्तें हेठ जम्मू दे भगवती नगर आधारि शिविर थमां 2 जुलाई गी तीर्थ यात्रियें दे पैहले जत्थे गी घाटी लेई रवाना कीता जाग। इसै सिलसिले च रामबन दे ए.डी.सी वरूणजीत सिंह चाढक होरें जात्तरा आहले रस्ते, टकोहदे थाहरें जि'आं जे चंद्रकोट, लम्बर ते बनिहाल पर जरूरती स्थूलतें दी उपलब्धता दी समीक्षा कीती। होरनें जिलें आहले लेखा रामबन जिला बी जात्तरा दौरान तीर्थ जात्रुएं दी सुरक्षा यकीनी बनाने लेई ते उनेंगी जरूरी सब्बे स्थूलतां उपलब्ध करोआने लेई पूरी चाल्ली तैयार ऐ। इस बारै होर जानकारी दिंदे होई ए.डी.सी रामबन वरूणजीत सिंह चाढक होरें आखेआ।

<><><><><><>

Salal-Gates

खित्ते च होआ'रदी लगातार ते भारी बरखा करी सलाल डैम दे गेट खोले गेन तां जे बददे पानी दे बहाव कन्नै निब्बड़ेआ जाई सक्के। इस एहतियाती गैऽ करी चनाब दरेआ दे कंडे ते हेठले इलाकें च पानी दा जल स्तर बदी सकदा ऐ। जिला प्रशासन नै आम लोकें गी सलाह दित्ती ऐ जे ओहू दरेआ दे कंडे पर नेई जान ते पूरी चाल्ली सौहगे ते सतर्क रौहन। मच्छी फगड़ने आहले ते खनन सरबंधी गतिविधिएं कन्नै जुड़े दे लोकें गी बी हिदायत कीती गेई ऐ जे ओहू अपनी गतिविधिएं गी अगले हुक्मै तोड़ी बंद करी देन। इस बारै होर जानकारी दिंदे होई इक पुलसकर्मी नै आखेआ।

<><><><><><>